



BOSNA I HERCEGOVINA
БОСНА И ХЕРЦЕГОВИНА
BOSNIA AND HERZEGOVINA

**URED ZA REVIZIJU INSTITUCIJA BiH
КАНЦЕЛАРИЈА ЗА РЕВИЗИЈУ ИНСТИТУЦИЈА БиХ
AUDIT OFFICE OF THE INSTITUTIONS OF BOSNIA AND HERZEGOVINA**



Muvekita 4, 71 000 Sarajevo, Tel/Fax: ++ 387 (0) 33 26 93 00, www.revizija.gov.ba, e-mail: saibih@bih.net.ba

Broj:

**IZVJEŠTAJ O REVIZIJI
PARLAMENTARNE SKUPŠTINE BOSNE I HERCEGOVINE
ZA 2007. GODINU**

Sarajevo, juni 2008. godine



SADRŽAJ

I	MIŠLJENJE REVIZORA	3
II	NALAZI I PREPORUKE	4
1.	Uvod	4
2.	Osvrt na preporuke iz Izvještaja o reviziji za 2006. godinu	4
3.	Sistem internih kontrola	4
4.	Planiranje - izvršenje budžeta	5
5.	Izvršenje budžeta	6
5.1.	Tekući izdaci	6
6.	Popis sredstava i izvora sredstava	7
7.	Usaglašenost sa zakonima i pravilima	7
7.1.	Nabavke	7
III	KORESPONDENCIJA	9

Prilog 1: Tabela 1 "Izvršenje budžeta za period od 01.01. do 31.12.2007. godine".

Prilog 2: Komentar Parlamentarne skupštine BiH na Nacrt izvještaja.

Prilog 3: Odgovor Ureda za reviziju na komentar Parlamentarne skupštine Bosne i Hercegovine na Nacrt izvještaja.

I MIŠLJENJE REVIZORA

Osnova za reviziju

Na osnovu Zakona o reviziji institucija Bosne i Hercegovine (Službeni glasnik BiH, broj: 12/06) izvršili smo reviziju finansijskih izvještaja koja se odnose na godinu koja se završava 31.12.2007. (Bilansa stanja, Posebnih pregleda uz Bilansu stanja i Analize izvršenja budžeta) u **Parlamentarnoj skupštini Bosne i Hercegovine**.

Odgovornost menadžmenta/revizora

Rukovodstvo Parlamentarne skupštine Bosne i Hercegovine odgovorno je za pripremu finansijskih izvještaja, zakonitost izvršenih transakcija i namjensko korištenje sredstava. Rukovodstvo je također odgovorno za uvođenje sistema internih kontrola kojima se osigurava pouzdano upravljanje javnim sredstvima.

Naša odgovornost, kao vanjskog revizora, propisana je Zakonom o reviziji, standardima revizije i etičkim kodeksom za revizore javnog sektora.

Shodno tome, naša odgovornost je izražavanje mišljenja o tome da li su finansijski izvještaji pouzdani i da li bilansa u potpunosti odražava rezultate izvršenja budžeta. Također, naša odgovornost je da procijenimo da li rukovodioci institucije primjenjuju zakone i propise, koriste sredstva za odgovarajuće namjene i da ocijenimo finansijsko upravljanje, funkciju interne revizije i sistem internih kontrola.

Cilj i djelokrug revizije

Reviziju smo obavili u skladu sa Revizionim standardima Međunarodne organizacije vrhovnih revizionih institucija – ISSAI i Međunarodnim standardima revizije. Revizija uključuje ispitivanje, na bazi izvršenih testiranja, dokaza koji su relevantni za iskazane iznose i objavljivanja u finansijskim izvještajima, te regularnost finansijskih transakcija koje su uključene u finansijske izvještaje.

Revizija je planirana i izvršena tako da se dobiju informacije i objašnjenja koja smatramo neophodnim za osiguranje dovoljno dokaza koji pružaju razumno uvjerenje da finansijski izvještaji ne sadrže materijalno značajne pogrešne iskaze uzrokovane greškama, prijevarama ili drugim neregularnim radnjama i kako su sredstva utrošena u skladu sa odobrenim budžetom i drugim propisima.

Smatramo da revizija koju smo izvršili pruža razumnu osnovu za naše mišljenje.

Kvalifikacija se odnosi na sljedeće:

- I.1. Propusti i nedostaci uočeni prilikom revidiranja procesa javnih nabavki tokom godine – vidjeti poglavlje 7.1. ovog Izvještaja.*

Prema našem mišljenju:

Finansijski izvještaji Parlamentarne skupštine Bosne i Hercegovine za 2007. godinu prikazuju realno i istinito finansijsko stanje na dan 31. decembra 2007. godine i u skladu su sa Pravilnikom o finansijskom izvještavanju i Pravilnikom o računovodstvu institucija Bosne i Hercegovine.

U svim materijalno značajnim aspektima, rashodi Parlamentarne skupštine Bosne i Hercegovine su upotrijebljeni za svrhe koje je odredila Parlamentarna skupština Bosne i Hercegovine i u skladu su sa relevantnim propisima, osim za moguće efekte koji su iskazani pod tačkom I.1, gore navedenom.

Sarajevo, juni 2008. godine

II Nalazi i preporuke

1. Uvod

Ured za reviziju je izvršio reviziju finansijskog poslovanja Parlamentarne skupštine Bosne i Hercegovine u skladu sa Zakonom o reviziji, uvažavajući opće uslove okruženja u kojem je egzistirala Parlamentarna skupština Bosne i Hercegovine. Revizijom su utvrđene određene nepravilnosti opisane u Izvještaju i Parlamentarnoj skupštini Bosne i Hercegovine je sugerisano da ih otkloni, odnosno poduzme potrebne radnje i prihvati predložene preporuke kako se nepravilnosti ne bi ponavljale u daljem poslovanju.

Revidiranjem poslovanja Parlamentarne skupštine Bosne i Hercegovine u 2007. godini utvrdili smo određene nedostatke i propuste koji se odnose na:

- Sistem internih kontrola koji propisuje rukovodstvo Parlamentarne skupštine Bosne i Hercegovine, koji nije, u potpunosti, organizovan na zadovoljavajućem nivou (vidjeti poglavlje 3. ovog Izvještaja);
- Planiranje budžeta za 2007. godinu (vidjeti poglavlje 4. ovog Izvještaja);
- Tekuće izdatke (vidjeti poglavlje 5.1. ovog Izvještaja);
- Izvršeni popis sredstava i izvora sredstava (vidjeti poglavlje 6. ovog Izvještaja)
- Izvršene nabavke tokom 2007. godine (vidjeti poglavlje 7.1. ovog Izvještaja);

2. Osvrt na preporuke iz Izvještaja o reviziji za 2006. godinu¹

Aktivnosti koje su u toku

- Popuna upražnjenih radnih mjesta, s napomenom kako procedure zaista dugo traju i imaju određene efekte na planiranje i izvršenje budžeta.
- Aktivnosti na unapređenju i dogradnji postojećeg sistema internih kontrola u skladu sa Vodičem za efikasnu internu kontrolu i COSO modelu sistema internih kontrola.

3. Sistem internih kontrola²

Revizija je utvrdila određene propuste i nedostatke u postojećem sistemu internih kontrola koji u određenoj mjeri povećavaju rizik da rukovodstvo Parlamentarne Skupštine Bosne i Hercegovine ne ostvari dovoljan uvid u sve aspekte poslovanja. Uočeni su propusti i nedostaci koji govore o slabostima realizovanja provedenih procedura nabavki (vidjeti poglavlje 7.1.), te nekim, po mišljenju revizije, nedovoljno jasno i precizno definisanim pravilima potrošnje za frekventne troškove tekućih izdataka (vidjeti poglavlje 5.1.), kao i procesu planiranja i izvršenja budžeta (vidjeti poglavlje 4. ovog Izvještaja). Napominjemo kako je važno da se kreira sistem internih kontrola tj. jasna i precizna pravila potrošnje svih značajnijih kategorija troškova u zakonskoj formi, a da se internim pravilima i procedurama izvrši samo operacionalizacija istih. U tom pravcu preporučamo analiziranje svih poslovnih procesa, identifikaciju značajnih troškova u procesu izvršenja budžeta i određivanje rizika poslovanja, te shodno procijenjenim rizicima kreiranje odgovarajućih sistema kontrola.

¹ Ove godine nismo planirali da radimo reviziju IT sistema

² Saglasno članu 13. stav 2. Zakona o reviziji institucija BiH, revizija ocjenjuje finansijsko upravljanje, funkciju interne revizije i sistem internih kontrola o čemu ne izražava mišljenje već izvještava o uočenim slabostima.

Preporuka:

Parlamentarna skupština Bosne i Hercegovine treba dodatno da jača sistem internih kontrola u skladu sa instrukcijom Ministarstva finansija i trezora, a sve u cilju otklanjanja svih mogućih rizika neracionalnog i netransparentnog raspolaganja javnim sredstvima. Svjesni smo činjenice važnosti uloge i specifičnosti Parlamentarne skupštine Bosne i Hercegovine, ali upravo iz tih razloga smatramo da bi Parlamentarna skupština Bosne i Hercegovine svojim primjerom trebala da pokaže viši nivo organizovanja sistema internih kontrola.

4. Planiranje - izvršenje budžeta

Analiza planiranog i izvršenog budžeta pokazuje kako Parlamentarna skupština Bosne i Hercegovine nije prekoračio stavke odobrenog (restrukturisanog) budžeta po vrstama rashoda, niti ukupan budžet za 2007. godinu, što se vidi u priloženoj tabeli - Izvršenje budžeta za period od 01.01. do 31.12.2007. godine (vidjeti prilog br. 1.). Ostvareni ukupni rashodi Parlamentarne skupštine Bosne i Hercegovine za 2007. godinu iznosili su 10.078.473,94 KM ili 1.910.194,06 KM manje od planiranih (realizovano je 84% od planiranih sredstava koja su iznosila 11.988.668,00 KM, a tražena sredstva su iznosila 12.140.000,00 KM). Posebice ističemo kako je budžet planiran na osnovu 175 zaposlenika, a isti je na kraju godine realizovan sa 156 zaposlenika (što se dijelom, po riječima zaposlenih, reflektuje na isplatu stimulacija i izvršenje budžeta, o čemu ćemo nešto više reći kasnije). U obrascu Pregled dinamike zapošljavanja za 2007. godinu broj zaposlenih sa 31.12.2006. godinu iznosio je 134, projekcija broja zaposlenih je 175, a broj zaposlenih na kraju godine je iznosio 156 zaposlenika. Planirana projekcija broja zaposlenih u 2007. godini iznosila je 41 novozaposlenih (primljeno je 10 zaposlenika gdje je natječaj provela Parlamentarna skupština Bosne i Hercegovine), ista nije realizovana zbog nemogućnosti Agencije za državnu službu da sprovede proceduru prijema novozaposlenih državnih službenika u prošloj godini (tri su oglasa objavljena za prijem 24 izvršioca i to 31.05.2007, 11.06.2007. i 26.09.2007. godine, ali nisu okončani u 2007. godini).

Pitanje dinamike zapošljavanja se izravno reflektovalo na isplatu stimulacija, ugovora o djelu i na sam stepen izvršenja budžeta.

Određeni nedostaci u procesu planiranja i izvršenja budžeta se upravo ogledaju u disproportiji planiranog i realizovanog broja zaposlenika – dinamika zapošljavanja, a to nam ipak ukazuje kako samo planiranje i izvršenje budžeta nije u potpunosti bilo zadovoljavajuće. Planiranje pojedinih budžetskih stavki nije u potpunosti realno i precizno izvršeno (plaće zaposlenih, naknade troškova zaposlenih na primjer, itd.), što se moralo korigovati restrukturisanjem budžeta u iznosu od 95.000,00 KM, a što je također dijelom utjecalo na stupanj ostvarenja budžeta po pojedinim stavkama.

Smatramo kako ovakav način planiranja nije u potpunosti zadovoljavajući, te bi trebalo da se u obzir uzmu realni planski zadaci koje Parlamentarna skupština Bosne i Hercegovine treba i može da realizuje, te stvarno potrebni troškovi i da se isti usklade sa finansijskim planom tj. odobrenim budžetom.

Posljedice ovakvog načina planiranja i izvršenja budžeta ogledaju se u neefikasnom korištenju - rezervisanju budžetskih sredstava u cjelini (radi se o iznosu 1.910.194,06) jer se neodgovarajućim planiranjem rezerviše više sredstava nego što je potrebno za normalno funkcionisanje i ostvarivanje zakonom propisanih funkcija Parlamentarne skupštine Bosne i Hercegovine, a na drugoj strani, moguće je da ostaju određeni projekti u drugim institucijama koji nisu mogli da budu niti planirani niti realizovani u tekućoj godini zbog nedostatka sredstava.

Preporuka:

Parlamentarna skupština Bosne i Hercegovine treba da sačini cjelovitu analizu procesa planiranja i izvršenja budžeta za 2007. godinu, kako na nivou ukupnog budžeta tako i po pojedinim budžetskim stavkama, te posebno sagledati problematiku broja zaposlenih – dinamiku zapošljavanja, kao ključnog elementa za proces planiranja i izvršenja budžeta (potrebno je da se ima više koordinacije sa Agencijom za državnu službu).

5. Izvršenje budžeta**5.1. Tekući izdaci**

Naknade za privremeno obavljanje poslova: Naknade za privremeno obavljanje poslova za zaposlenike i državne službenike regulisane su internim "Pravilnikom o plaćama i naknadama zaposlenih u Sekretarijatu Parlamentarne skupštine Bosne i Hercegovine" (prečišćeni tekst). Tokom 2007. godine isplaćene naknade za privremeno obavljanje poslova nepopunjenih radnih mjesta te naknade u slučaju povećanja obima poslova iznosile su oko 57.196,13 KM. Sagledavanjem cjelokupne problematike uočili smo relativno dug vremenski period u kojem su spomenute naknade isplaćivane. Naime, za većinu zaposlenika i državnih službenika u Sekretarijatu Parlamentarne skupštine Bosne i Hercegovine, naknade za privremeno obavljanje poslova nepopunjenih radnih mjesta su isplaćivane tokom cijele 2007. godine, dok je u određenim slučajevima uočeno da su naknade isplaćivane u kontinuitetu na osnovu rješenja iz prethodnih godina.

Preporuka:

Mada je isplata naknada za privremeno obavljanje poslova nepopunjenih radnih mjesta, te naknada u slučaju povećanog obima poslova, vršena na osnovu odgovarajuće dokumentacije i odobrenja Agencije za državnu službu BiH, smatramo da je neophodno da se preispita opravdanost isplate navedenih naknada sa posebnim osvrtom na dužinu vremenskog perioda obavljanja poslova za koje se navedene naknade isplaćuju. Smatramo da gore spomenute naknade imaju svoju svrhu ako se koriste neko razumno razdoblje, a ni u kom slučaju godinu dana i više.

Ugovori o djelu: Na osnovu testiranog uzorka zaključenih ugovora o djelu u 2007. godini uočeno je kako su revidirani ugovori zaključivani na kraju perioda (mjeseca) u kojem je osoba koja je zaključila ugovor bila angažovana.

Općenito gledano, uočeno je kako je tokom 2007. godine bilo angažovano više osoba na osnovu ugovora o djelu (192.461,00 KM). Kada se sagleda sistematizacija radnih mjesta i njena popunjenost postavlja se pitanje razloga za nepopunjenost radnih mjesta, što uzrokuje potrebu za privremeno angažovanjem osoba po osnovu ugovora o djelu.

Preporuka:

Ukoliko postoje potrebe za angažovanjem osoba na osnovu ugovora o djelu, potrebno je da se prije samog angažovanja osoba zaključi ugovor kojim se regulišu prava i obaveze ugovornih strana, a ne kako je to do sada vršeno nakon obavljenih poslova.

6. Popis sredstava i izvora sredstava

Prilikom revizije popisa sredstava i izvora sredstva utvrđeno je kako je u Glavnoj knjizi Parlamentarne skupštine Bosne i Hercegovine na poziciji Priprema i izgradnja zgrada (konto 011631) evidentiran iznos od 2.736.861,89 od kojeg se na 2007. godinu odnosi 691.131,60 KM. Navedeni iznosi se odnose na kapitalna ulaganja u zgradu Parlamentarne skupštine Bosne i Hercegovine.

Kako se zgrada Parlamentarne skupštine Bosne i Hercegovine vodi u knjigama Službe za zajedničke poslove institucija BiH, a Parlamentarna skupština Bosne i Hercegovine kao i još neke institucije koje imaju sjedište u istoj zgradi, vode ulaganja u zgradu u svojim knjigama, smatramo kako je neophodno rješavanje pitanja evidentiranja stvarne vrijednosti zgrade. Sadašnjim načinom povećava se rizik da vrijednost zgrade bude precijenjena jer je izvršeno knjiženje procijenjene vrijednosti zgrade u poslovnim knjigama Službe za zajedničke poslove institucija BiH, kada su u procjenu ušla i dotadašnja ulaganja drugih institucija.

Preporuka:

U saradnji sa Službom za zajedničke poslove institucija BiH potrebno je da se riješi pitanje zgrade Parlamentarne skupštine Bosne i Hercegovine kako po pitanju vlasništva tako i u vezi sa knjigovodstvenim evidentiranjem a sve u cilju pravilnog evidentiranja državne imovine po fer i realnoj vrijednosti. Nadalje, i prilikom planiranja budžeta trebalo bi da se jasno i precizno zna ko će koje poslove obavljati (primjerice ko će regulisati kapitalna ulaganja a ko tekuće održavanje itd.), da bi se moglo kvalitetno planirati.

7. Usaglašenost sa zakonima i pravilima

7.1. Nabavke

Nabavka tiska (cca 17.000 KM): Revizijom provedenog postupka za nabavu tiska (dnevnog, tjednog i mjesečnog) utvrđeno je kako je tokom 2007. godine dva puta poništavan postupak nabavke jer se kroz provedeni konkurentski postupak nije javio niti jedan ponuđač. Također je utvrđeno kako je i u 2006. godini vođen postupak koji je također dva puta poništavan jer nije bilo ponuđača u konkurentskom postupku koji je provođen. Shodno tome na snazi u 2006. i 2007. godini bio je ugovor iz 2005. godine. Uvidom u dokumentaciju iz 2007. pa i 2006. godine kada su provođeni konkurentski postupci koji nisu uspjeli, uočeno je da je u sva četiri ponovljena postupka Parlamentarna skupština Bosne i Hercegovine objavljivala obavještenje o nabavci u Službenom glasniku BiH, pri čemu je izostavljeno dostavljanje zahtjeva za dostavu ponude na adrese dobavljača.

Preporuka:

U skladu sa ZJN, u konkurentskom postupku, obavezno se dostavljaju zahtjevi za dostavu ponuda na adrese dobavljača (najmanje tri adrese), pri čemu je objava u Službenom glasniku fakultativna. Na ovaj način znatno se povećava vjerojatnost da će se dobavljači odazvati i dostaviti ponude.

Usluge popravke vozila (61.496 KM): Procedura izbora dobavljača je započeta u 2006. godini, zbog nedovoljnog broja ponuda ista je dva puta obnavljana i izbor dobavljača je okončan tek u 2007. godini. S obzirom na planirani iznos nabavke bilo je primjerenije primijeniti neki drugi zakonom dozvoljen postupak (npr. konkurentski) kako bi procedura izbora dobavljača bila efikasnija. Također smo uočili da je izbor dobavljača vršen na osnovu jediničnih cijena usluga a na izbor dobavljača nije utjecala cijena dijelova.

Postavljeni su kriteriji za vrednovanje koji nisu mjerljivi (reference), a za ocjenu podkriterija "uslovi i način plaćanja" postoji uputstvo Ministarstva finansija i trezora da se uporedne analize ponuda zasnivaju na utvrđivanju sadašnje vrijednosti nabavke korištenjem diskontne stope na kratkoročne bankarske depozite u Bosni i Hercegovini, kako bi se osigurala uporediva kalkulacija ponuđenih cijena svih sudionika na tenderu.

Gorivo (53.557 KM): Nabavka goriva u 2007. godini se vrši na osnovu ugovora koji je zaključen u 2006. godini i primjenjuje se za tu budžetsku godinu (član XV). Nije precizno navedeno da li se ugovor primjenjuje za 2007. godinu, niti nam je prezentovana dokumentacija o eventualnom provođenju procedure izbora dobavljača u 2007. godini.

Adaptacija Plave sale (381.689 KM) : Zbog nedovoljnog broja ponuda u prvom postupku nije vršena evaluacija, a ponude su vraćene neotvorene. Skrećemo pažnju na mišljenje Agencije za javne nabavke o obavezi otvaranja ponuda na mjestu i u vrijeme kako je navedeno u tenderskoj dokumentaciji bez obzira na broj primljenih ponuda. Kako obje dostavljene ponude prelaze planirani iznos nabavke, a s obzirom da se radi o višegodišnjem projektu, potrebno je voditi računa o pravovremenim aktivnostima na usklađivanju namjenske strukture kapitalnih izdataka prilikom realizacije izdataka u budžetu za 2008. godinu. Kriterij uslovi plaćanja je postavljen i kao zahtjev u tenderskoj dokumentaciji (60 % avansa) i istovremeno postavljen kao kriteriji za bodovanje. Skrećemo pažnju na Instrukciju Ministarstva finansija i trezora u vezi načina usklađivanja različitih uslova plaćanja kao jednog od podkriterija za bodovanje prilikom evaluacije ponuda.

Rekonstrukcija liftova (197.682 KM): Zbog nedovoljnog broja ponuda u prvom postupku, postupak je poništen, a ponude vraćene neotvorene. Skrećemo pažnju na mišljenje Agencije za javne nabavke o obavezi otvaranja ponuda na mjestu i u vrijeme kako je navedeno u tenderskoj dokumentaciji bez obzira na broj primljenih ponuda.

Avio – karte (106.580,00KM): Revidirajući ovaj postupak uočili smo kako se nastavilo raditi sa dobavljačem koji je izabran u 2006. godini (postupak započet u 2005. godini), i gdje je rečeno da ugovor može da se koristi i u 2007. godini ili do izbora novog dobavljača. Postupak se ponavljao više puta. Revizija je svjesna činjenice kako je složen proces izbora avio prijevoznika u skladu sa Zakonom o javnim nabavkama, ali bi ubuduće trebalo da se ulože dodatni napor i pokuša iznaći odgovarajuće rješenja.

Nabavka automobila (115.000 KM): Prilikom testiranja ove procedure nabavke uočili smo kako su prilikom evaluacije vrednovani tj. bodovani kriteriji kvaliteta ponuđene robe, gdje se tretiralo da li Parlament ima poslovno iskustvo ili ne, i reference ponuđača. Ovakvim načinom bodovanju su u stvari favorizovani dobavljači koji su imali poslovnu saradnju sa Parlamentarnom skupštinom Bosne i Hercegovine što nije u skladu sa Zakonom o javnim nabavkama.

Opći utisak je da su procedure kasno započete (npr. obavještenja o nabavci objavljena krajem septembra odnosno u oktobru). Također smo stekli utisak da u svim slučajevima nisu primijenjeni odgovarajući postupci koji bi možda omogućili da se procedure izbora okončaju bez više ponavljanja.

**Opća preporuka za javne nabavke:**

Neophodno je da se izvrši analiza nedostataka i propusta koje smo uočili revidiranjem izvršenih nabavki u toku 2007. godine, na osnovu koje bi se steklo određeno iskustvo koje će omogućiti da se nabavke u narednom periodu pripreme na bolji i efikasniji način. Također, potrebno je da se više pažnje posveti pravovremenom pokretanju postupaka javnih nabavki kako bi zaključeni ugovori bili primjenjivi u godini na koju se postupak javne nabavke odnosi.

Za sve nejasnoće i dileme tokom provođenja procedura nabavki, ubuduće preporučujemo obavezno konsultovanje Agencije za javne nabavke.

III Korespondencija

Parlamentarnoj skupštini Bosne i Hercegovine je uručen Nacrt izvještaja o reviziji za 2007. godinu na razmatranje i dostavljanje eventualnih novih dokaza i komentara na nalaze revizije.

U ostavljenom roku od 15 dana, Parlamentarna skupština Bosne i Hercegovine je dostavila komentare na nalaze sadržane u Nacrtu izvještaja o reviziji.

Po našoj procjeni, Parlamentarna skupština Bosne i Hercegovine nije dostavila nove dokaze i činjenice koje bi značajnije utjecale na izmjenu nalaza sadržanih u Nacrtu izvještaja o reviziji, a pojedini komentari su djelimično uvaženi. Po tom osnovu ovaj Izvještaj predstavlja konačni izvještaj dostavljen klijentu sa određenim korekcijama u odnosu na Nacrt izvještaja o reviziji.

U prilogu Izvještaja dostavljamo vam komentar Parlamentarne skupštine Bosne i Hercegovine na Nacrt izvještaja i naš odgovor na komentare Parlamentarne skupštine Bosne i Hercegovine.

Sarajevo, juni 2008. godine

GENERALNI REVIZOR

M.P.

Milenko Šego